

ጳውሎሲ ቆላሲያሳ አሳስ ፃፊዳ ኪታ ጋሳ ቆፋ

ጳውሎሲ ቆላሲያሳ አሳስ ፃፊዳ ኪታይ ፃፊትዳይ፣ ጉሳ ኢሲያን፣ ኤፌሶናፕ ዶሎሃ ባጋራ ዴዲያ ቆላሲያሳ ካታማን ዴዲያ ምሳ ኬሳሳ። ሄ ምሳ ኬሳ ኤሲዳይ ጳውሎሳ ጊዶና ኢቢኮካ፣ ሮሜ ቢታን ኢሲያ ዋና ካታማ ጊዲዳ ኤፌሶናፕ ምንጌላ አሳንቾታ ኪቴይ ኢያ ጊዲያ ጊሾ ቆላሲያሳስካ አዋቴሲ ኢያው ዴዴስ። ቆላሲያሳ ምሳ ኬሳን፣ «ምሳ ኤራናውኔ ኩሜሳ አቶቴሳ ዴማናው አሲ ኡባይ አያና ምልቃታሲኔ ማታታስ ንይናናው ኮሼስ» ያጊያ ምርዶ አስታማሬቲ ዴዴይሳ ጳውሎሲ ሲዲስ። ሄ አስታማሬቲ ታማርሲያ ሃራባይ፣ ቃሲ፣ «አሲ ኡባይ ቃፃሮ ዳኒያ ምጋታስ ሃራታናውኔ ካሳ ምጋ ኡባ ናጋናው ኮሼስ» ያጎሶና።

ጳውሎሲ ሃ ኪታ ፃፊዳይ፣ ቱማ አማኖ ቲሚርቲያ ታማርሲዲ፣ ኤንታ ምርዶ ቲሚርቲያ ላላናሳ። ኢ ዛሪዳ ዛርታፕ ዋናቴይ፣ «ዩሱስ ኪሪስቶሲ ኩሜሳ አቶቴሳ ኢሜስ፤ ሃራ ሃይማኖቱቲኔ አሶቲ ኢያፕ ሃሶሶና» ያጊይሳ። ምሳይ ኪሪስቶሳ ባጋራ አላሚያ ሜዲስ። ቃሲ ኢያ ባጋራ ዛሪዲ ባኮ ኤሃና። ሃ አላሚያስ አቶቴሳ ኡፋይሳይ ዴዴይ ኪሪስቶሳ አማኖና። ሄሳ ጊሾ፣ ጳውሎሲ ሃ ጊታ ቲሚርቲይ አማኒያ አሳ ዴምን ዋኒዲ አሶን ፔፃናው ቤሲያኮ አዴስ። ሃ ኪታይኔ ኤፌሶና አሳስ ፃፊዳ ኪታይ፣ ባ አይኪዳ ቆፋኒኔ ኪታን ምሲ ዳኖሶና። ሃ ናምቡ ማፃፋታ ጊዶን ዴዲያ ዱማቴሳይ፣ ኤፌሶናን ኪሪስቶሲ ምሳ ኬሳስ ሁዔ፣ ቆላሲያሳን ኪሪስቶሲ ሜዴቴሳስ ሁዔ።

ሃ ኪታ ጳውሎሳፕ ኤኪዲ ቆላሲያሳ ጋሳናው ቢዳ ቲኪቆሳራ ኢሲፌ ዴዴይ አናስምሳ ጊዴይሳ ቤሶይ ማዲያባ። ዋኒዲ ጊኮ፣ ጳውሎሲ አናስምሳ ጌቴቲያ ባ አሳንቾዋባ ፊልሞናስ ሃራ ኪታ ፃፊስ።

ቆላሲያሳ ኪታ አይፌ ቆፋታ

ጌሎ ቆፋ 1:1-8

ኪሪስቶሳ ካንዱዋኔ አሱዋ 1:9-2:19

ኪሪስቶሳን ዴዲያ አራሳ ዴም 2:20-4:6

ዉርሴሳ ሳሮሶኔ ኩሻ ቆፋ 4:7-18

1 ምሳ ሼኔን ኪሪስቶሲ ዩሱሳ ሃዋሬ ጊዲዳ ጳውሎሲኔ ኑ ኢሻ ጊሞቲዮሲ፣ 2 ቆላሲያሳ ካታማን ዴዲያ ኪሪስቶሳን ጊሻታሲኔ

አማኔቲዳ አሳስ ገፊዳ ኪታ።

የሳ ኑ አዋፕ አዶ ኬሃቴሳይኔ ሳሮቴሳይ ሂንቴው ጊዶ።

ጋላታ ዎሳ

³ ኑኒ ሂንቴው ዎሲያ ዎዴ ዎሳ ኑ ጎዳ፣ ዩሱስ ኪሪስቶሳ አዋ ኡባ ዎዴ ጋላቶስ። ⁴ ኑኒ ኪሪስቶስ ዩሱሳን ዴዒያ ሂንቴ አማኑዋኔ ጌሻታ ኡባስ ዴዒያ ሂንቴ ሲቁዋ ሲዒዳ። ⁵ ሄሳ ሂንቴ አሲዳይ ሂንቴ ኡፋይሳይ ሳሎን ሂንቴው ናጌቲዳ ጊሾሳ። ሂንቴ ቱማ ኪታ ጊዲዳ ዎንጌላ ኮይሮ አማኒዳ ዎዴ ሄ ኡፋይሳ ሲዒ ዴታ። ⁶ ሂንቴ ሄ ዎንጌላ ሲዒዳ ዎዴኔ ዎሳ አዶ ኬሃቴሳ ቱማ ሻኪ ኤሪዳ ዎዴፕ ዶሚዲ ሂንቴ ጊዶን ሃኒዳይሳዳ ቢታ ኡባን ዲጨሼኔ አይፊሼ ዴዴስ።

⁷ ሂንቴ ሄሳ ኑራ ኢሲፊ ኪሪስቶሳስ አሲያ አማኔቲዳ፣ ዶሴቲዳ ኤጳፊራፕ ታማሪዴታ። ⁸ ኢ ሄሳ ቦላ ጉጂዲ አያናይ ሂንቴው ኢሚዳ ሲቁዋባ ኑስ አዲስ።

⁹ ሄሳ ጊሾ፣ ኑኒ ሂንቴባ ሲዒዳ ጋላሳፕ ዶሚዲ፣ ዎሳይ ባ ሼኒያ ሂንቴና ቤሳና ሜላኔ፣ ጊሻ አያናይ ኢሚያ ኤራቴሳኒኔ ጨንጫቴሳ ኡባን ሂንቴና ኩንሳና ሜላ ኡባ ዎዴ ሂንቴው ዎሳ ዎሶስ። ¹⁰ ሄሳዳካ፣ ጎዳይ ኮዬይሳዳ ሂንቴ ዳና ሜላ፣ ኡባ ዎዴ ኢያ ኡፋይሳና ሜላ፣ ሎዎ አሶ ኡባን ሂንቴ አይፊ አይፋና ሜላኔ ዎሳ አሲ ኤሪሼ ዲጫና ሜላ ዎሳ ዎሶስ።

¹¹ ዎሳ ቦንቾ ዎልቃይ ሂንቴ ኡባባ ጌንጫናዳኔ ዳንዳዳናዳ ባ ሚኖቴሳ ኢሚዲ ሂንቴና ኡፋይሶ። ¹² ቃሲ ጊሻታ ፖዎ ካዎቴሳ ላታና ሜላ ሂንቴና አሲዳ አዋ ጋላቲቴ። ¹³ ኢ ኑና ዱማ ዎልቃፊ አሺዲ ባ ዶሲያ ናዓ ካዎቴሳኮ ኤሂስ። ¹⁴ ኢያን ዎዜቲዲ ኢያ ሱሳን ናጋራ አቶቴሳ ዴሚዳ።

ኪሪስቶሳ ዶቃቴሳ

¹⁵ ኪሪስቶሲ ቤንቶና ዎሳስ ቱማ ሴሚሶ። ኢ ሜዴቴሳ ኡባፊ ባይራ። ¹⁶ ኡባባይ ኢያ ባጋራ ሜዴቲስ። ቤንቲያባቲኔ ቤንቶናባቲ፣ ዎልቃቲኔ ጎዳቲ፣ ሃሬይሳቲኔ ማታ አዋቲ፣ ሳሎኒኔ ሳዓን ዴዒያ ኡባይ ኢያወኒ ኢያ ባጋራ ሜዴቲስ። ¹⁷ ኢ ኡባባፕ ካሴ ዴዴስ። ኡባባይ ኢያን ባ ቤሳን ቤሳን አይኬቲዲ ዴዴስ። ¹⁸ ኢ ባ አሳቴሲ ጊዲዳ ዎሳ ኬሳስ ሁዔ። ኢ ኡባፊ ቦላ ጊዳናው ሃይቆፕ ዴንዶን ሲንሴኔ ባይራ።

¹⁹ ዎሳይ ባ ኩሜሳ ዎሳቴሳራ ኢያን ዳናው ኮዩስ። ²⁰ ቃሲ ማስቃሊያ ቦላ ጉሲዳ ባ ናዓ ሱሳን ሳሮቴሳ ሜዲዲ ሳሎኒኔ ሳዓን ዴዒያ ኡባ ኢያ ባጋራ ባራ ሲጌሲስ።

1:7 ቆላ 4:12፤ ፊልሞ 23 1:14 ኤፌ 1:7 1:18 ኤፌ 1:22-23 1:20 ኤፌ 2:16

21 ሃይሳፌ ካሴ ሂንቴ ቆፋ ኢታቴሳይ ሂንቴና ያሳፌ ሻኪሲኔ ኢያራ ሞርኬ አሲስ፤ ሂንቴ አሶይካ ኢታ። 22 ሺን ሃዒ ኪሪስቶሲ አሾን ሃይቂዳ ሃይቂዋ ባጋራ ያሳይ ሂንቴና ባራ ሲጌሲዲ፥ ጌሻታ፥ ቦሬይ ባይናይሳታኔ ሂሎታ አሲስ። 23 ሂንቴ፥ ሂንቴ አማኑዋን ቃያና ሚኒዲኔ ሃጲዲ ዳናው ቤሴስ። ሂንቴ ዎንጌላ ቃላ ሲዒዳ ዎዴ ኤኪዳ ኡፋይሳ ሚንሲ አይኪቴ። ሄ ዎንጌላይ ሂንቴ ሲዒዳይሳኔ ቢታ ኡባን ሳባኬቴዳይሳ። ታ፥ ጳውሎሲካ ሃ ዎንጌላስ አሳንቾ ጊዳስ።

ጳውሎሳ ሃዋሬቴሳ አሱዋ

24 ታኒ ሂንቴ ጊሾ ሃዒ ኤኪያ ዋያን ኡፋይታይስ። ኪሪስቶሲ ኢያ አሳቴሲ ጊዲዳ ዎሳ ኬሳስ ኤኪዳ ዋያ ታኒ ታ አሾዋን ፖላይስ። 25 ያሳ ቃላ ሂንቴው ፖላዳ አዳና ሜላ ታው ኢሜቲዳ ማታን ዎሳ ኬሳስ አሳንቾ ጊዳስ። 26 ሃ ቃላይ ካሴ አዲዳ ዎዲያን ዮሌቴሳ ኡባፌ ጌሚዲ ዴዒስ። ሺን ሃዒ ያሳይ ሃ ፀራ አማኒያ ኡባስ ቆንጨሲስ። 27 ያሳይ አይሁዴ ጊዶና አሳ ጊዶን ሃ ፀራ ቦንቾ ዱሬቴሳ ቆንጨሲስ። ኢካ ቦንቾ ኡፋይሲ ጊዲዳ ሂንቴ ጊዶን ዴዒያ ኪሪስቶሳ።

28 ሄሳ ጊሾ፥ ኢሲ ኢሲ አሲ ኪሪስቶሳን ኩሜሳ አሲ አሲዲ ሺሻናው ጨንጫቴሳ ኡባን አሳ ታማርሶኒኔ ዞሬን ኪሪስቶሳባ ሳባኮስ። 29 ያሳይ ባ ጊታ ዎልቃን ታናን አሲያ ጊሾ ሃዒ ጋካናው ኢያ ዎልቃን ባዌታይሲኔ ዳቡራይስ።

2

1 ታ ሂንቴዉኔ ሎዶቂያ ካታማን ዴዒያ አሳስ፥ ሄሳዳካ ታና አይፌን ቤዒቦና አሳ ኡባስ አይ ሜላ ባዌቲያኮ ሂንቴ ኤራና ሜላ ኮያይስ። 2 ታ ባዌቲያ ጋሶይካ ኤንቲ ባንታ ዎዛናን ሚኒዲ፥ ሲቆን ቃሼቲዲ፥ ፖሎ ጊዲዳ ኩሜሳ አኬካ ዱሬቴሳ ዴሚዲ ያሳ ፀራ ኪሪስቶሳ ኤራና ሜላሳ። 3 ኢያን ያሳይ ሚንጂዳ ኤራይኔ ጨንጫቴሳ ኡባይ ዴዒስ።

4 ታ ሄሳ አኒካ ሂንቴና ጨዋ ቃላን ባሌሶና ሜላ ኮያዳ ጋይስ። 5 ታ ሂንቴፌ ሃካዳ ዴዒኮካ አያናን ሂንቴራ ዴዒይስ። ሂንቴ ዱሳ ማራኔ ኪሪስቶሳ ሂንቴ ሚኒዲ አማኔይሳ ቤዓዳ ኡፋይታይስ።

ኪሪስቶሳን ዴዒያ ኩሜሳ ዴዎ

6 ሂንቴ ኅዳ ኪሪስቶስ ዮሱሳ ኤኪዳይሳዳ ኢያን ዴዒቴ። 7 ኢያን ሃጳ ዮዲቴ፤ ኢያን ኬዌቴቴ። ሂንቴ ታማሪዳይሳዳ አማኖን ሚኒቴ፤ ያሳስ ኩሚዲ ፓላሂዳ ጋላታ ኢሚቴ።

8 ኪሪስቶስ ጊዶናሺን አሳ ዎጋኒኔ ሃ አላሚያ ጮ ዎጋን ካቲዳ ቲሚርቲያኒኔ አሳፕ ዩዳ ኤራቴሳን አኒካ ሂንቴና ጨሚ ባሌሲዲ ዲያና ሜላ ናጌቲቱ። 9 ያሳ ያሳቴሳይ ኪሪስቶስ አሳቴሳን ኩሜሲ ዴዔስ። 10 ሂንቴካ ማታሲኔ ዎልቃ ኡባስ ሁዔ ጊዲያ ኪሪስቶስን ኩሚዴታ።

11 ሂንቴ ኪሪስቶስ አማኒዲ ቃፃሬቲዴታ። ሄሲካ አሳ ኩሼን ጊዶናሺን ሂንቴና ኢታ ሃኖቴሳፌ ዲጊያ ኪሪስቶስን አሴቲዳ ቃፃሬቱሲ። 12 ሂንቴ ማግቁቲዳ ዎዴ ኪሪስቶስ ሊሲፌ ሞጌቲዲ፣ ኪሪስቶስ ሃይቆፕ ዴንሲዳ ያሳ ዎልቃ አማኒዲ፣ ኪሪስቶስ ሊሲፌ ዴንዲዴታ።

13 ሂንቴ፣ ሂንቴ ናጋራ ጊሾኔ ሂንቴ ጩጋ አሳቴሳ ቃፃሬቶና ጊሾ ሃይቂዲ ዴዒሺን፣ ያሳይ ሂንቴ ናጋራ አቶ ጊስ። ኪሪስቶስ ሂንቴው ዴያ ኢሚስ። 14 ኢ ኑና ሞቲያኔ ኑራ ኤቁቲያ፣ ኑ ቦላ ፃፌቲዳ አጩዎ ዳኪዲ ማስቃሊያ ቦላ ዲሺዲ አጌፕ ዲጊስ።

15 ኪሪስቶስ ዎልቃታኔ ማታታ ማስቃሊያን ያኒዲ፣ ኤንታ አላ ዳንጩዎ ቢሊሲዲ፣ ዲዔቲዳ አሳዳ አሲዲ ኤንታ ቆንጩን ዩሺዲ ቤሲስ።

16 ሄሳ ጊሾ፣ ሚያባን ዎይኮ ኡያባን፣ ባሌ ጋላስ ዎይኮ አጌኒ ሄሪያ ቃማ ቦንቾን አኒካ ሂንቴ ቦላ ፒርዶፎ። 17 ሃይሳቲ ሲንሳፌ ያናው ዴዒያባታስ ኤሾ፣ ሺን ቱማይ ኪሪስቶስ። 18 ቆዴፕ ቆሞ አሽኪቴሳኒኔ ኪታንቾ ጎይኖን ጩቁቲያ አኒካ ሂንቴና ሂንቴ ዎይቱዎፕ አሾፎ። ሄሳ ሜላ አሲ ባ ቤዒዳ ቆንጩሳን ናሼቲሼ ባ አሾ ቆፋን ጮ አቶርቱስ። 19 ሄሳ ሜላ አሳስ ሁዔ ጊዲያ ኪሪስቶስ ጋሄቴሲ ባዎ። ኢ አሳቴሳ ኡባ ሻያኒኔ ኬሶን ኬሶን ጋሲ አይሲዲ ሙዚዲ ዲቼስ። ያሳይ ሄሳ ሜላ አጌን አሳቴሳ ኡባስ ዲቼ ኢሚስ።

አራሳ ዴያ

20 ሂንቴ ኪሪስቶስ ሃይቂዲ ሃ አላሚያ ሃሪያ አያናታ ዎልቃፌ ላዓ ኬዩዴታ። ያቲን፣ አይስ ሻኬቶና አሳዳ ጊዲዲ ሃ ዎጋታስ ሃሬቱቲ? 21 ሃ ዎጋቲ፣ «አይኮፋ፣ ላጮፋ፣ ቦቾፋ» ጌቲይይሳታ። 22 ሃ ኡባይ አሳ ዎጋኔ ቲሚርቲ ጊዲያ ጊሾ አሶ ቦላ ፕዒዳፕ ጉዬ ዳያና። 23 ሃ ኪታቲ ቦንቾኔ ጨንጫቴሲ ዳኒዲ ቤንታናው ዳንዳሶና። ሃ ዎጋቲ ዎሴ ዳር ዶሲሲያባ፣ አሽኪኔ ሂንቴ አሳቴሳ ሃሪሲያባ ዳኖሶና፣ ሺን ኑ ኢታ አሞቴሳ ቦላ ዎልቁ ኤንታው ባዎ።

2:12 ሮሜ 6:4 2:13 ኤፌ 2:1-5 2:14 ኤፌ 2:15 2:16 ሮሜ 14:1-6
2:19 ኤፌ 4:16

3

አራሳ ዴያ

1 ሂዛ፣ ሂንቴ ኪሪስቶሳራ ሃይቆፔ ዴንዲዳይሳዳ፣ ያሳፌ ኡሻቻ ባጋን ኡቲዳ ኪሪስቶሲ ዴዲያ ቤሳን፣ ሳሎን ዴዲያባታ ኮዩቴ።

2 ሳሎን ዴዲያባታ ቦላ ሂንቴ ቆፋ ዎሲቴፔ አቲን ሳዓን ዴዲያባታ ቦላ ዎሶፊቴ። 3 ሂንቴ ሃይቆን ሻኬቲዳ ሜላ ሃ አላሚያፔ ሻኬቲዴታ። ሂንቴ ዴያይ ኪሪስቶሳራ ኢሲፌ ያሳን ጌሚስ። 4 ሂንቴው ዴያ ጊዲዳ ኪሪስቶሲ ቆንጨያ ዎዴ ሄ ዎዴ ሂንቴካ ኢያራ ቦንቾን ቆንጫና።

5 ሄሳ ጊሾ፣ ሂንቴናን ዴዲያ አላሜ አሞታ ዎዲቴ። ሄሳቲካ ላይማቴሲ፣ ቱናቴሲ፣ ላይማታናው አሞቴሲ፣ ኤቃ ጎይኖ ሜላ ጊዲዳ ኡዜቴሲ። 6 ሃይሳታ ጋሶን ያሳ ሃንቆይ ኪቴቶና አሳ ቦላ ያና። 7 ሂንቴካ ካሴ ሄ ኢታ አጊያን ቢያ አሳ ጊዶን ዴዲሼ ሃይሳታ አሲዴታ።

8 ሃሂ ሂንቴ ሄሳታ አሶፊቴ። ቃሲ ሃንቆ፣ ኢያ፣ ካቺ፣ ዚጊርሲኔ ቦርሶ ኦዳ ሂንቴፌ ዲጊት። 9 ጩጋ አሳቴሳ ኢያ አሱዋራ ሂንቴፌ ቃሪዳ ጊሾ ኢሶይ ኢሱዋስ ዎርዶቶፒቴ። 10 ያሳ ሜዶ ዳኒያ፣ ኤራቴሳን ላሜቲዳ አራሳ አሳቴሳ ማዒቴ። 11 ሃ አራሳ ሜዴቴሳን፣ ጊሪኬ አሲ ዎይኮ አይሁዴ አሲ፣ ቃፃሬቲዳይ ዎይኮ ቃፃሬቶናይ፣ ባርባሬ አሲ * ዎይኮ ኢስኩቴ አሲ † አይሌይ ዎይኮ ዎማኖይ ባዋ። ኪሪስቶሲ ኡባ፤ ኢ ኡባን ዴዴስ።

12 ሄሳ ጊሾ፣ ያሳን ዶሬቲዳ አሳዳ ጊሻታኔ ዶሴቲዳይሳታ ጊዲዲ፣ ማርቴሳ፣ ኬሃቴሳ፣ አሽኬቴሳኔ ዳንዳዓ ማዒቴ።

13 ኢሶይ ኢሱዋ ዳንዳዒቴ። አኒካ ባ ላጊያን ቆሄቲዳባይ ዴዲኮ ኢያው አቶ ጎ። ጎዳይ ሂንቴው አቶ ጊዳይሳዳ ሂንቴካ ዎሊስ አቶ ጊቴ። 14 ሄ ኡባ ቦላ ኡባባ ኢሲፌ ሺሺዲ ቃቺያ ሲቆ ማዒቴ።

15 ያሳይ ሂንቴና ኢሲ አሲ አሲዲ ዪጊዳይ፣ ሳርቴሳስ ጊዲያ ጊሾ ኪሪስቶሳ ሳርቴሳይ ሂንቴ ዎዛና ሃር።

16 ኪሪስቶሳ ቃላይ ሂንቴ ዎዛናን ኩሚዲ ዴያ። ጨንጫቴሳ ኡባን ኢሶይ ኢሱዋ ታማርሲቴኔ ዞሪቴ። ማዘሙሬን፣ ሳባኒኔ አያና ዩሳን ያሳ ዎዛናፔ ጋላቲሼ ዩዒቴ። 17 ያሳ አዋ ዩሱሳ ባጋራ ጋላቲሼ ሂንቴ አዴቲያባ ዎይኮ አሲያባ ኡባ ጎዳ ዩሱሳ ሱንሳን አሲቴ።

3:1 ማዘ 110:1 3:9 ኤፌ 4:22 3:10 ሜዴ 1:26፤ ኤፌ 4:24 * 3:11 ባርባሬ አሲ፣ ጎሳይ ታማሪቦና ዎይኮ ኤርና ዎይኮ ዩሱቲዳ ሜላ ሲዒ ጊዲ ዴዲያ አሲ ጉሱ። † 3:11 ኢስኩቴ አሲ፣ ጎሳይ ዎዛና ሚኖ አሲ ዎይኮ ዎዛና ኢታ አሲ ጉሱ። 3:12 ኤፌ 4:2 3:13 ኤፌ 4:32 3:16 ኤፌ 5:19-20

አማኒያ አሳ ዱሳ

18 ማቼቶ፥ አማኒያ አሳስ ቤሲያባ ጊዲያ ጊሾ ሂንቴ አዘናታስ ሃሬቲቴ።

19 አዘናቶ፥ ሂንቴ ማቼታ ሲቂቴ፤ ኤንታው ኢቶፒቴ።

20 ናይቶ፥ ሂንቴና ዩሊዳይሳታስ ኡባባን ኪቴቴቴ፤ ሄሲ ጎዳ ኡፋይሲያባ።

21 አዋቶ፥ ሂንቴ ናይቲ ኡፋይሲ ቃንዖና ሜላ ኤንታ ጫሜሶሬቴ።

22 አይሌቶ፥ ሳዓን ሂንቴው ጎዳ ጊዲዳይሳታስ ኡባባን ኪቴቴቴ። ጎዳ ቦንቺሼ ሱሬ ዎዛናፕ ኪቴቲዲ ኤንታ ኡፋይሲቴፕ አቲን አሲ ቤያ ጊዲ አሶሬቴ። 23 ሂንቴ አሲያ አሶ ኡባ አሳስ ጊዶናሺን ጎዳስ አሲያ ሜላ ዎዛናፕ አሲቴ። 24 ጎዳፕ ሳታ ዎይቶ አሲዲ ሂንቴ ኤኬይሳ ኤሪቴ፤ ሂንቴ ጎዳ ኪሪስቶሳ ሃጋዜታ። 25 ያሳይ አሳ ሶምዖ ቤዒዲ ፒርዶና ጊሾ አኒካ ኢታ አሶ አሲኮ ባ ኢታ አሱዋ ጊሾ ዛሮ ኤካና።

4

1 ጎዳቶ፥ ሂንቴወካ ቃሲ ሳሎን ጎዳይ ዴዔይሳ ኤሪዲ፥ ሂንቴ አይሌታስ ሂሎቴሳኒኔ ኢሱዋ ኢሱዋሬ ሻኮና ኮሺያባ አሲቴ።

2 ያሳ ባርኪዲ ጋላቲሼ ቃንዖና ዎሲቴ። 3 ያሳይ ባ ቃላስ ፔንጌ ዶያና ሜላኔ ታኒ ሄሳ ጋሶን ቃሾን ዴዒያ ኪሪስቶሳ ፀራ አዋጃና ሜላ ኑስካ ዎሲቴ። 4 ቃሲ ታካ ቤሴይሳዳ ቃላ ቆንጫሳዳ አዳና ሜላ ታው ያሳ ዎሲቴ።

5 ኢንጄቲያ ዎዴ ኡባ ጎዔቲሼ አማናና አሳ ማታን ጨንጫቴሳን ዴዒቴ። 6 ሂንቴ አሳ ኡባስ ኮሺያ ዛሮ ኢዋ ኤራና ሜላ ሂንቴ አዳይ ኡባ ዎዴ አጾ ኬሃቴሳን ኩሚዳይሳኔ ማጌዳ ማልዒያባ ጊዳናው ቤሴስ።

ዉርሴሳ ሳሮታ

7 ኑ ሲቆ ኢሻይ ቲኪቆሲ፥ ታራ ኢሲሬ ጎዳ አሱዋን አይሌ ጊዲዳ፥ አማኔቲያ አሳንቾይ፥ ታ ዴዑዋባ ሂንቴው አዳና። 8 ታኒ ኢያ ሂንቴኮ ኪቲዳይ፥ ኑ ዋኒዲ ዴዒያኮ ሂንቴው አዲዲ ሂንቴና ሚንሴሳና ሜላሳ። 9 አናስዎሲ፥ አማኔቲያ ሲቆ ኢሻይ፥ ሂንቴ

3:18 ኤፌ 5:22፤ 1ጴጊ 3:1 3:19 ኤፌ 5:25፤ 1ጴጊ 3:7 3:20 ኤፌ 6:1 3:21 ኤፌ 6:4 3:22 ኤፌ 6:5-8 3:25 ኤፌ 6:5-8 4:1 ኤፌ 6:9 4:5 ኤፌ 5:16 4:7 ሃ.አ 20:4፤ 2ጊዋ 4:12 4:7 ኤፌ 6:21-22

ባጋይ፥ ኢያራ ሂንቴኮ ቤስ፥ ኤንቲ ሃይሳን ሃኒያባ ኡባ ሂንቴው አዳና።

10 ታራ ቃሼቲዳ አሪስጊሮኮሲኔ ባርናባሳ ኢሻ ናዓይ ማርቆሲ፥ ሂንቴና ሳሮ ያጎሶና። ታ ሂንቴው ካሴ አዲዳይሳዳ ማርቆሲ ሂንቴኮ ቤኮ ኢያ ሞኪቴ። 11 ዩሱሳ ጊያ ያስያሲ ሂንቴና ሳሮ ሳሮ ያጌስ። ያሳ ካዎቴላ ጊሾ ታራ አሲያ አሳታ ጊዶፌ አይሁዴ ጊዲዳይሳቲ ሃ ሄቫታ፤ ኤንቲ ታና ዳሮ ሚንጴሲዶሶና።

12 ሂንቴ ባጋይ፥ ኪሪስቶስ ዩሱሳ አይሌይ፥ ኤጳፊሪ ሂንቴና ሳሮ ሳሮ ያጌስ። ኢ ሂንቴ ያሳ ሲንሳን ሚኒዲ ኤቃናዳኔ ያሳ ሼኒያ ኤሪዲ ፖላና ሜላ ኡባ ዎዴ ያሳ ሂንቴ ጊሾ ዎሴስ። 13 ኢ ሂንቴ ጊሾኔ ሎዶቂያንኔ ሂራፖሊሳ ካታማን ዴዲያ አሳ ጊሾ ዳሮ ዳቡሪዳይሳ ታ ማርካታይስ።

14 ኑ ሲቆ ኢሻይ ዶቶሬይ ሉቃሲኔ ዴማሲ፥ ሂንቴና ሳሮ ሳሮ ያጎሶና። 15 ሎዶቂያን ዴዲያ ኑ ኢሻታስ፥ ኒምፋሲኔ ኢ ኬላን ሺቂያ አሳስ ኑ ሳሮሉዎ አዲቴ።

16 ሃ ዳብዳቢያ ሂንቴ ናባቢዳፔ ጉዩ፥ ሎዶቂያ ዎሳ ኬላን ናባቢሲቴ። ሂንቴካ ሎዶቂያ ዎሳ ኬላይ ሂንቴው ዩዲያ ዳብዳቢያ ናባቢቴ። 17 ቃሲ አርኪጳሳ፥ «ጎዳይ ኔው ኢሚዳ አሱዎ ፖላናይሳ ዶጎፓ» ያጊዲ ቆፊሲቴ።

18 ታኒ፥ ጳውሎሲ፥ ሃ ሳሮሉዎ ታ ኩሼን ፃፋስ። ታ ቃሹዎ ቆፒቴ።

ያሳ አዶ ኬሃቴላይ ሂንቴራ ጊዶ።

4:9 ፊልሞ 10-12 4:10 ሃ.አ 19:29፤ 27:2፤ ፊልሞ 24፤ ሃ.አ 12:12፤ 25፤
13:13፤ 15:37-39 4:12 ቆላ 1:7፤ ፊልሞ 23 4:14 2ጊሞ 4:10-11፤
ፊልሞ 24 4:17 ፊልሞ 2

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
